

Sos Tres Res

S'avian sos Tres Res cun sa ghia
cun sos bolantes suos assistentes

Su motivu chi est nadu su Messia
un'istella at bessidu in oriente.

In favore a Zuseppe e a Maria,
e a su fizu sou onnipotente

Continente si tucan sos Tres Res,
ca Gesus est naschidu in Betlemme.

Tocan su portale de Betlemme,
incontrana sa porta beneita.

Si falana dae caddu totos tres,
dimandendelis grazias infinitas.

Nende chi:-Nois semus sos Tre Res,
bennidos po li fagher s'inbisita

in favore a Zuseppe e a Maria,
po riconnoschere su veru Messia-

A bider'a Maria tantu ermosa,
su chelu si mustreit de allegria.

S'anghelu Crabielle lende rosa
po coronare su veru Messia.

Santu Zuseppe cun sa sua isposa,
cun duos pastores in cumpagnia,

cantende melodia bravamente,
incontresit sos Res de oriente.

Pascas cumpridas potedas gosare,
annuntziadas cun d-ogni aumentu.

Cun abundantzia, cantu b'at rena in mare,
vivedas in custu mundu annos chentu.

Cust'anima potedas cunservare,
orazione d-ogni ora e momentu.

Fora de pensamentu e chentza zelu,
a betzos mannos gosedas su chelu.

Tocat su portale e tando intresit,
si parat Deus cun su mundu in manu.

Santu Zuseppe transidu restesit,
ca su piseddu si paresit canu.

Ajò, a si nde pesat sa padrona
a nos la dare cudda bon'istrina,

Deus bos diat chent'annos de vida,
e poi a sa 'etzesa vida 'ona.

Tradizionale